

ETORKINAK. Nafarroako egunkari nagusietako lan eskaintzetan eta etxebizitza alokatzeko iragarkietan atzeritarrak baztertzeko esaldiak gero eta gehiago dira. Etorkinei laguntzeko taldeen ustetan, kalean sumatzen den giroaren ispilu dira.

Lan edo alokairu iragarkietan mezu arrazistak ugaritu direla salatu dute

Sos Arrazakeriak otsailetik eginiko kontaktak kezka nabaria sortu du, eta horren aurkako kanpaina abiatuko dute laster

Alberto Barandiaran | IRUÑEA

Lana bilatu edo etxebizitzak alokatzeko Euskal Herriko egunkarietan argitaratzen diren iragarkietan mezu arrazistak agertzen hasi direla salatu du SOS Arrazakeria taldeak, eta kanpaina iragarri du horren kontra borrokatzeko.

Mezu arrazistak azken hilabeteotan sumatzen hasiak dira, eta, Nafarroako sailak egindako jarraipenaren arabera, apiriletik 70 bat iragarki agertu dira *Diario de Navarra* eta *Diario de Noticias* egunkarietan.

Iragarkietan, «atzeritarrik ez» edo «persona espainola behar da» dioten eranskinak agertzen dira eskaintzaren ondotik. Hori, SOS Arrazakeriarendako, «guztiz arbuigarria» da.

«Egia da enpresaburuak bere langileak aukeratzeko eskubidea duela eta etxeko nagusiak etxea nori alokatu erabakitzen ahal duela; alabaina, aukeraketak ezin dira bazterkeria nagusi den praktika horretan oinarritu», adierazi du Luis Fernandez taldeko abokatuak.

«Pertsona ezin da baztertu jaio den lekuan jaiotzeagatik, sexuarengatik, etniagatik edo erlijioarengatik baztertu ezin den bezala».

Otsailetik aurrera hasi dira agertzen

Kutsu arrazista duten iragarkiak berriak dira. Ines Jimenez SOS Arrazakeria taldeko kideak dioenez, otsailean hasi ziren, Nafarroan bederen, lehenak agertzen, eta hortik aurrera ugaritu egin dira. Egun zenbaitetan kutsu horretako sei iragarki topatu dituztela adierazi du Jimenezek.

«Agertzen hasi dira 'neska nafarrak lan egingo luke...' eta gisako esaldiak erantsita dituzten mezu asko ere, eta horiek lana bilatu eta lortzeko eta etxea alokatzeko iragarkietan agertzen hasi dira batez ere».

Nahiz eta elkarte horrek batez ere Nafarroan atzeman duen iragarki horien ugaritzea, Gipuzkoako eta Bizkaiko hainbat egunkaritan ere agertu direla ohartarazi nahi izan dute.

Etxebizitza, etorkinendako arazorik larrienetakoa

Etxebizitzena da, noski, atzeritarrendako arazo larrienetakoa, eta haien egoera konpontzeko lanean ari diren taldeek frankotan salatu dute irtenbide handirik gabeko korapiloa dela afera.

«Jendea hasi da etxebizitzak alokatzeari uko egiten, eta, azkenean, haien lagunen edo senideen etxeetan bizi behar dute, eta gero eta pilaketa handiagoak daude, eta orduan gero eta gutxiago alokatzen diete...».

Nolanahi ere, horrelako iragarkiak Nafarroan — zehatzago, Iruñerrian — zabaltzen ari diren keinu eta espresio arrazistekin lotu daitezke. Eta horretan komunikabideek duten egitekoa nabarmendu dute SOS Arrazakeriak.

Esaterako, joan den urtarrilean, Nafarroako Gobernuak ateratako babes ofizialeko etxebizitzaren eskaintza berria zela eta, Nafarroako komunikabide nagusiak etxebizitza horien jabe egin zirenen %38 etorkinak zirela argitaratu zuen. Berria emateko moduak kritika ugari eragin zituen etorkinen inguruko taldeen artean.

«Komunikabideek sekulako garrantzia dute berria emateko orduan», dio Ines Jimenezek, «eta egia da harrezkeroztik sumatu dugula kalean gero eta irain arrazista eta xenofobo gehiago: ahozko bortizkeria deitzen duguna areagotu da, nabarmen gainera».

Iragarkia behin-behinekoa izateak edo ekimen pribatuaren bitartez sortu dela argudiatzeak ez du zentzurik, Luis Fernandez abokatuarentzat. «Hasieratik ez badiugu jarrerak aldatzen, arazoak ihes egingo digu eskuetatik».



LANDER F. ARROIAIBE / ARGAZKI PRESS

Etxebizitza izateko eskubidea aldarrikatzeko etorkinek Iruñean egindako elkarretaratze bat.

KANPAINA

'Alokatu etxea zure lagunari'

Etxebizitzaren arloan bereziki indarra egiteko, SOS Arrazakeria Elkartek etorkinei etxebizitzak alokatzeko kanpaina jarriko du martxan datorren hilabetean, Nafarroan. Kanpaina horren bidez, arrazakeriaren aurkako taldeak hainbat liburuxka banatuko ditu etxe agentzietan, korapiloa askatzeko. «Asmoa dugu korapiloa askatzeko: hau da, jendeak aloka ditzala pisuak, etxeetan horrelako jende pilaketa handiak izan ez daitezken, eta horrela arazorik sortu ez dadin». Iruñerriko Jabeen Zentrala izeneko enpresaren funtzionamendua salatu dute tal-

dekoek, kalte handia egiten ari delako etorkinen artean. Zentral horrek kontratua sinartzatzen dio etxe bila dabilenari, eta diru baten truke etxebizitza lortuko diola hitzematzen dio. «Sei hilabete pasatuta, etorkinendako etxerik ez dutela aurkitzen arrazoitzen dute, eta, azkenean, dirua galtzen dute». Etxeak alokatzeko arazoa ez da, noski, Nafarroan bakarrik gertatzen. Joan den otsailean Javier Galparsoro Espainiako ipar-mendebaleko Errefuxiatuen Laguntzarako Batzordeko lehendakariak salatu zuen Bizkaiko 62 etxe agentziak etorkinei etxerik ez zietela alokatzen, nahiz eta agentzietan bertan batzordeko kideak agertu. Azkenean, batzordeak kanpaina egin behar izan zuen komunikabideetan, eta herritar zenbaitek pisuak alokatzeko zizkieten.